

Noticia
Transparente
di Gobierno

ISLAONLINE

Diahuebs 4 Januari, 2024

Email: IslaOnline@gobierno.aw Tel: 528-4952



Gabinete Wever-Croes



PRIME MINISTER

Evelyn Wever-Croes



AÑA 2024: AÑA DI STABILIDAD Y PROSPERIDAD

Despues di e pandemia mundial di Covid-19, Pais Aruba a logra metanan di recuperacion y crecimiento economico den 2023, danki na e exito den turismo. Economia a crece cu 'double digits' creando miles di cupo di empleo.

"Locual nos no a logra ainda den 2023 ta pa e prosperidad aki yega den cada rincon di nos pais. Ainda tin famianan cu ta pasa den duro, cu mester traha dos, of hasta tres trabou, pa logra cubri e gastonan. Costo di bida a aumenta debi na e inflacion cu nos ta importa riba cada cos cu nos cumpra.

Esey nan lo ta e prioridadnan pa aña 2024. Pa consolida e crecimiento cu nos a conoce den 2023, pa duna e estabilidad cu nos mester den nos pais, den nos comercio, den nos hogarnan, pa asina e progreso y prosperidad por yega den hogar di cada ciudadano. Progreso y Prosperidad crea a base di inversion y innovacion.

Meta di Gabinete Wever-Croes II ta pa nos logra establece un isla cu un economia productivo y stabiel, un pais cu por paga su debenan y alaves inverti den su futuro, pa crea oportunidadnan pa nos futuro generacionnan realisa nan soñonan.

Un isla cu un desaroyo sostenibel y husto, cu por brinda un calidad di bida cu salud, progreso y felicidad pa un y tur, specialmente pa esnan mas vulnerable. Un comunidad cu ta trata otro cu respet, cu tolerancia y cu ta inclui tur hende den e progreso y prosperidad", Prime Minister Evelyn Wever-Croes a expresa.

Prome Minister Evelyn Wever-Croes:

GOBIERNO ACTUAL NO TA ESUN CU A DUNA ST REGIS HOTEL TERENO PA CONSTRUI UN HOTEL NA ARUBA



Pa aclarea cualquier duda den comunidad, Prome Minister Evelyn Wever-Croes a duna un splicacion breve, riba e tereno cu a ser otorga na St Regis pa por construi un hotel na Aruba. Prome Minister a splica cu na 2016, tempo cu sra Marisol Lopez-Tromp tabata minister di infraestructura, el a cera un compromiso cu St Regis, cu a indica di ta interesa pa construi un hotel na Aruba, consistiendo di 308 camber.

Na 2017, ex minister di infraestructura, sr Otmar Oduber, mirando cu no por a elimina e acuerdo aki, a tuma e decision pa sinta na mesa cu St Regis pa purba re-negocia e acuerdo aki, pa

reduci e suma di camber otorga. Despues di hopi negociacion, a logra yega na un acuerdo pa baha e cantidad di camber na 200. Construcion pa cu e hotel aki, a inicia na 2019 y lo dura un par di aña prome cu e hotel por habri su portanan oficialmente.

"E ta importante pa aclarea e dudanan aki den comunidad, y pa pueblo di Aruba ta bon informa di unda cierto decisionnan ta bin. E prioridad di Gabinete Wever-Croes ta pa traha na bienestar di pueblo, y pa comunidad di Aruba ta altanto di tur desaroyo, cu e informacion corecto," Prome Minister a expresa.



AÑA 2024:
**AÑA DI
STABILIDAD Y
PROSPERIDAD**



MINISTER

Ursell Arends



Minister Ursell Arends

A CELEBRA AÑA NOBO HUNTO CU PISCADONAN DI ARUBA

Diabierna 29 di december, Minister Arends tabata invitado special pa celebra mas cu solamente e transcurso di tempo hunto cu piscadonan di Aruba.

Hunto na Centro di Bario Noord a bin ta celebra piscadonan nan dedicacion na un ofishi cu ta basa profundamente den tradicion y necesidad, un ofishi cu ta conecta e comunidad cu lama y ta sostene bida.

"Hopi storia mi a bin ta tende di Aruba su piscadonan y sigur ta di admira boso tenacidad, cu den cara di desafio y e madruganan cu boso ta bataya cu elementonan di naturalesa, pa trece "catch" di dia," Minister Arends a menciona den su discurso.

Piscadonan di Aruba ta encarna e spirito di determinacion y perseverancia cu sigur Aruba su antepasadonan por ta orguyoso di dje. E trabou di un piscado no solamente ta yena tayan, pero tambe ta stimula e comunidad, manteniendo e tradicion y cultura bibo.

Continuacion **MINISTER URSELL ARENDS A CELEBRA AÑA NOBO ...**

Durante e celebracion a honra cinco di Aruba su baluarte piscadonan pa nan tremendo contribucion na e industria di pesca:

- Nel Maduro
- Ruben Willems
- John Laurens
- Claudio Wolff
- Ronnie Dania

Mientras a despedi di aña 2023 y yama 2024 bon bini, ta Minister Arends su sincero deseo pa nos carga cu nos e lesnan siña for di lama – e abilidad pa adapta, pasenshi y e importancia di traha hunto pa un meta comun. Minister Arends ta sigui kere firmemente cu maneho ta wordo traha den pueblo y cu pueblo.

Palabra di danki ta bai na tur piscado pa nan conocimiento y experiencia

comparti durante e ultimo aña aki. Danki tambe na Fundacion Centro di Pesca Hadicurari pa a organisa tremendo fiesta unda piscadonan por a bini hunto pa comparti un rato ameno cu otro.

Minister Arends ta desea un aña 2024 yena cu cosechanan abundante, prosperidad y cu Aruba su piscadonan subi lama y bolbe bek sigur.





Minister Ursell Arends: 1000 MATA NATIVO A WORDO PLANTA

Prome cu aña a cera, diferente organisacionan ambiental y tambe companianan cu tin naturalesa na pecho a bini hunto pa celebra e gran logro di 1000 mata planta cu e fundacion Ban Lanta y Planta.

Durante e ultimo añanan Minister Arends y su team tabata tin e placer pa pone man na obra y experiencia crecimiento di cada mata cu e fundacion a bin ta planta na e Bucuti & Tara GMC Nature Preserve. Sigur un logro remarcabel cu ta cultiva un ecosistema floreciente.

Esaki ta demostra cu di pasonan chikito te na e esfuersonan

grandi, tur hende por hunga un rol den conservacion di Aruba su naturalesa. Ta un oruguyo pa mira con e comunidad di Aruba ta uni pa preserva e beyeza natural di nos isla.

Palabra di gradicimento na e fundacion su team completo, specialmente Anita Mijts-Aerts y Jeroen Van Dasselaar como tambe tur boluntario y organizacion cu ta asisti pa hunto yuda Aruba su naturalesa recupera.

Ministerio di Naturalesa ta habri 2024 cu deseonan pa mas avanse di iniciativanan ambiental tanto riba tera como bou di awa.







Minister Maduro

TA FELICITA TUR PARTICIPANTE Y GANADONAN DI E FESTIVAL INFANTIL Y HUBENIL DI DANDE

Masha danki pa biba nos Cultura di Fin di Aña



Continuacion MINISTER MADURO TA FELICITA TUR PARTICIPANTE....

Diahuebs dia 28 di december ultimo Minister di Cultura tabata presente na Centro di Bario Tanki Lender pa felicita y gradici tur e participantenan di e Festival Infantil y Hubenil di Dande organisa pa Comision Promove Cultura.


Un total di 13 participante den 3 categoria di edad, a subi tarima pa deleita e publico cu e musica di Dande cu ta nos folklore y tradicion di Fin di Aña.

Cada un di nan a duna un bunita presentacion, a canta e Dande cu hopi pasion y tabata un ganador riba nan mes. Sinembargo den cada categoria a brinda un premio pa esun cu a resalta mas.

Rey di Dande 7 pa 9 aña ta Jaymerson Kelly, Reina di Dande 10 pa 12 aña ta Lizzie Webb y Reina di Dande 13 pa 17 aña ta Stephany Quandt.

Minister Maduro tabata tin e honor e placer di por a corona tur e ganadonan y felicita nan pa nan bunita aporte na Cultura di nos Pais. E mandatario ta gradici tur e agrupacionnan cu a compaña e hobennan. Palabra di gratitud tambe ta bay pa Comision Promove Cultura, Comision Celebracion Dianan Nacional, Setar y tur instancia y persona cu ta aporta pa asina por organisa e festival di Dande Infantil y Hubenil cu ta brinda nos hobennan y Pueblo en general e oportunidad pa nos biba nos Cultura di Fin di Aña. Masha danki y Ay Nobe!





Minister Maduro

A PASA BISHITA E EVENTO ATA UN DANDE PABO' NA ROTONDE DI PARADERA



Riba diabierna 29 di december, Minister Maduro di Cultura a pasa bishita e evento 'Ata un Dande Pabo' na Rotonde di Paradera. Ta pa di 4 biaha cu sr. Luigi Rasmijn ta organisa e evento pa asina trece e dushi ambiente di Fin di Aña den e distrito di Paradera.

Tabata tin presentacion di varios grupo musical, entre nan, Alma Folklorico, Sodo y Cuero, Sonido di Antaño y Caha di Orgel nos herencia. Bunita tabata pa por a mira y scucha sr.



Joe Hieroms toca Dande riba su steelband. Varios cantante tambe a presenta nan Dande, cual a trece e publico den e dushi ambiente net prome cu e Festival di Dande Adulto tuma luga na Club Caiquetio.

Minister Maduro di Cultura ta felicita sr. Luigi Rasmijn y su team cu a percura pa decora e rotonde di Paradera cu luz y tambe pa organisa e evento bunita aki pa e Pueblo di Paradera por a disfruta di nos tradicion y e ambiente dushi di Fin di Aña.

Potretnan Minister Maduro A PASA BISHITA EVENTO DI DANDE...





Minister Maduro

TA FELICITA TUR PARTICIPANTE Y GANADONAN DI FESTIVAL DANDE ADULTO 2023

Siman pasa diabierna anochi Minister Maduro tabata presente na Club Caiquetio pa presencia e Festival di Dande Adulto 2023.

E mandatario ta gradici tur agrupacion y cantante cu a forma parti di e 51 Edicion di Festival aki na vispera di Aña Nobo y e resultado ta lo siguiente:

Rey di Dande, Jonathan Croes, Segundo luga Jair Boekhoudt y Tercer luga Robert Maduro Junior.

Reina di Dande, Raquel Lampe, Segundo luga Pricella Quandt y Tercer luga Mary Jane Vrolijk.

Categoria Tipico, Ganador "Mi Tera", Tipico Stimami, Segundo luga "Casibari", Tipico Pegasaya y Tercer luga "Pilar", Tipico Colegio Arubano.

Categoria Propio Composicion e cancion ganador a resulta "Shon Polis", presenta pa Alma Folklorico.

Minister Maduro tabata tin e placer di corona nos Rey di Dande 2023, Jonathan Croes y nos Reina di Dande 2023, Raquel Lampe. Un danki na Fundacion Cultural di Festivalnan Folclorico, Unoca, CCDN, Setar y tur instancia y persona cu a aporta pa asina por organisa e festival di Dande Adulto 2023.

Tambe danki na e Pueblo en general pa biba nos Cultura di Fin di Aña. Pabien na tur participante y ganadonan.







TRABOUNAN INICIA Y/OF REALISA DEN ENSEÑANSA DURANTE AÑA 2023

Minister di Enseñansa y Deporte Endy Croes a haci un resumen di e trabounan cu mas a resalta durante aña 2023 den e tereno di enseñansa y a indica cu aña 2023 tabata un aña cu varios reto, pero a pesar di tur dificultad a logra resultadonan positivo y prospero pa Pais Aruba. Esaki ta danki na e liderasgo y vision di Gabinete Wever Croes II y danki na Parlamento di Aruba cu ta kere den e trabou. A realisa trabounan di acuerdo e maneho Enseñansa den Transicion, cu pilarnan manera Doorlichtingsrapport, Sustainable Development Goals 4 y PEN 2023. Tambe a enfoca riba e calidad basico di enseñansa, pero alabes a brinda oportunidad na un y tur pa por tin acceso na enseñansa. Minister Endy Croes a indica cu e ta orguyoso di mira avance grandi riba e desicionnan tuma y trabounan realisa den e fase di mehoracion di enseñansa di Aruba den su totalidad.

PROYECTO DI DATA

Di acuerdo cu recomendacion 1 di Doorlichtingsrapport, a inventarisa y a traha hopi di cerca cu Tijdelijke Werk Organisatie (TWO) y Ministerie van Binnenlandse Zaken en Koninkrijksrelaties (BZK) di Hulanda. A traha un Plan van Aanpak cu ta aproba desde october 2023 door di Hulanda. Hulanda a aproba 1.7 miyon florin pa realisa e Proyecto di Data, unda cu 85 scol di Aruba lo bay den un solo sistema, esta esta 'Open Emis' na Departamento di Enseñansa Aruba.

MANEHO DI IDIOMA

En conexion cu recomendacion 2 di Doorlichtingsrapport cual ta trata maneho di idioma, a instala un team di profesional cu a produci un rapport. A tuma decision dia 31 di maart pa un maneho di idioma nobo, pa asina cumpli cu deadline di Hulanda.

A planea pa implementa Alfabetisacion den Papiamento den tur eerste klas di scol basico na Aruba desde augustus 2024. Den e luna di november di aña 2023, a inicia e prome training pa tur cabesante y maestro di eerste klas di scol basico na

Aruba. Un total di 93 maestro y cabesante a asisti na e training aki y lo tin 5 seccion mas di training durante aña 2024. Den e luna di januari 2024 lo print tur material pa e training aki. Esaki ta un inversion di 1 miyon florin.

FINANCIAMENTO DI ENSEÑANSA:

Abasedirecomendacion 10 di Doorlichtingsrapport, a contrata un register accountant, kende a traha un verantwoordingsprotocol y un accountantsprotocol conforme ley pa asina tur bestuur di scol por raporta conforme regla. Recientemente, a ricibi e conseho final di DWJZ riba e protocolnan aki. Januari 2024 lo present'e na tur schoolbestuur.

PROYECTO PA MODERNISA LEYNAN DI ENSEÑANSA

En cuadro cu recomendacion 11 di Doorlichtingrapport, a instala un comision pa modernisa leynan di enseñansa. E proyecto Modernisacion di Leynan di Enseñansa ta dirigi riba renobacion di tur ley di enseñansa y traha leynan nobo cu tin mester, leynan manera LV scol preparatorio, LV scol basico, LV scol secundario y LV enseñansa superior. Tambe Beroeps onderwijs, Inspectie Onderwijs y Speciaal onderwijs lo bay haya nan propio landsverordening. A inventarisa tur e leynan den enseñansa y ta trahando riba esakinan.

A contrata un experto di Hulanda cu ta yudando den e proyecto aki. Esaki ta un proyecto grandi. Minister Endy Croes a indica cu e ta contento cu e Ley di Inspectie van Onderwijs cu nunca tabata existi ta cla caba y entreg'e na DWJZ pa cana su caminda pa por yega Parlamento di Aruba.

SALARIO DI DOCENTE

A instala un comision pa traha riba e salario di docente. Ta premira cu den e luna di januari 2024 nan lo presenta nan prome conseho riba e tematica aki. Pues, ta trahando cu alma y cuerpo riba e veld di enseñansa.

VIERLANDENOVERLEG

Riba nivel di Reino Hulandes a atende 4 Landenoverleg na januari 2023 na Curaçao, april y juni via ZOOM y november na Hulanda. Durante e 4 Landenoverleg a logra firma un acuerdo di e proyecto di Berca di Reino (Koninkrijksbeurs), unda Hulanda a aloca 500 mil euro pa e studiantenan por haci intercambio (of stage) dentro di Reino Hulandes, prome nan tuma un desicion final unda nan kier continua nan estudio.

Tin 3 estudiante cu ya a haci uzo di esaki den 2023 y actualmente ta na Hulanda. Banda di esaki, a haci palabracionnan concreto pa Strategic Education Alliance (SEA), entre otro, un grupo di consorcio di universidadnan di Hulanda hunto Universidad di Aruba lo haci un analisis riba e mercado laboral, asina por ahusta nos enseñansa na necesidad y nivel di e mercado laboral. Tambe, lo train e decanonan na Aruba y lo crea un sistema di LVS pa “track” nos studiantenan den exterior.

Pa loke ta trata Proyecto Kibrahacha: samen opleiden en professionaliseren di e docentenan di paisnan den Reino Hulandes, tin un “samenwerkingsprotocol” firma y e proyecto ta canando hopi bon. Tin 93 docente di 15 opleidingsscholen ta participando activo na esaki. E colaboracion aki ta conduci na mehoracion den comunicacion y afinacion entre e institutonan cu ta prepara docente, schoolbesturen y Gobierno di Aruba.

PROYECTONAN REALISA DEN 2023

A organisa un anochi informativo den The Movies IMAX na Gloria Theater pa inspira y stimula nos studiantenan cu kier bay studia na Hulanda, preparando nan pa locual nan ta bay enfrenta. Esaki tabata un exito rotundo cu un sala sold out. Tambe, a organisa HENA Higher Education North America pa e studiantenan cu kier bay studia na Merca of Canada, a trece diferente college y universidad Mericano y Canades pa brinda informacion na nos studiantenan.

Na september 2023, a firma un MoU nobo cu Consul USA di Curaçao pa e oficina di Education USA na Aruba pa brinda sosten na e studiantenan cu kier bay Merca. Banda di esaki, a logra pa 9 estudiante di Colegio EPI bay eherce nan pasantia na Iberostar Mexico cu tur gasto cubri. Esaki a efectua hunto cu colega Minister Glenbert Croes.

Tambe, a firma un acuerdo beneficoso cu ROC Mondriaan pa Colegio EPI. Fuera di esaki, a lansa hunto cu IPA y DEA e plataforma digital MATRIX, cual ta un plataforma unda tur docente por subi pa sigui e cursonan pa profesionalisacion den un forma flexibel y personalisa. Na final nan lo ricibi certificado pa esaki.

AVANCENAN DI DIENST PUBLIEKE SCHOLEN (DPS)

A firma un acuerdo cu SETAR pa pone fiber na tur scol di DPS cu un pakete special. E acuerdo aki ta parti di e proyecto di Fiber ‘Next Generation’ pa scol cu e meta pa haci e futuro resiliente pa e infraestructura y servicionan di nos scolnan y asina hunto hiba nos scolnan na e siguiente nivel cu fiber. Cu instalacion di Fiber na tur scol di DPS ta haci cu tin un speed di internet mas lihe. Esaki ta e prome stap cu a tuma pa e desaroyo di digitalisacion den enseñansa.

Tambe, proyecto pa conecta tur 20 scol di DPS riba un sistema di data ta andando y ta casi cla. DPS tabata e unico schoolbestuur cu no tabatin un sistema di data. E siguiente stap ta pa conecta tur 20 scol di DPS cu Departamento di Enseñansa via “interface”.

Banda di esaki, tabatin alrededor di 30 caso caminda cu e docentenan tin derecho riba “kindertoelage” y no a ricibi esaki. Na luna di januari y februari di aña 2023, a regla esaki y e proyecto aki ta finalisa. Fuera di esaki, a inventarisa mas di 100 ambtsjubileum cu tin retraso y den prome 2 lunanan di 2024 lo finalisa e proyecto aki.

OPENBARE AVONDLEERGANGEN ARUBA (OAA)

Openbare Avondleergangen Aruba (OAA) a logra un acuerdo di colaboracion cu Aruba Food and Beverage Association pa prepara y educa e empleadonan cu kier traha den e sector aki cual tin un necesidad. OAA den colaboracion cu Aruba Food & Beverage Association (AFBA) a lansa pa prome biaha un programa innovativo y educativo unda cu a combina e experiencia practico y estudio.

E programa ta pa persona di 17 aña bay ariba cu ta desea di drenta den e sector di “Food & Beverage”. E programa tin un duracion di un aña pa un aña y mey. Ora e participantenan finalisa nan estudio nan ta ricibi e diploma di Assistent Horeca, Voeding of Voedingsindustrie.

E programa ta encera cu e participantenan ta traha 39 ora pa siman den un establecimiento cu ta miembro di AFBA y lo dedica seis (6) ora semanal na les presencial na OAA. Cual ta suma un total di 45 ora pa siman. OAA a integra un enfoque moderno, haciendo e programa digital, cu ta perminti pa e studiantenan siña riba nan mesun tempo.

KIES COACH

A contribui den e proyecto di Kies Coach, unda cu 11 instructor di Hulanda a bin Aruba pa prepara 44 docente di scol basico y scol secundario. Un programa pa educa e docentenan di scol basico y scol secundario pa duna sosten na yiu di mayornan divorcia y/of separa.

E docentenan ta ricibi guia y training necesario pa brinda atencion na e alumnonan di e mayornan separa. Un total di dies ora durante un aña escolar ta wordo dedica n’e alumnonan aki. Den e sesionnan aki e muchanan ta siña con pa surpasa nan emocionnan negativo pa e separacion di nan mayornan.

CAAM-HP

A firma un acuerdo den luna di november hunto cu colega Minister Dangui Oduber cu Caribbean Accreditation Authority for Education in Medicine and other Health Professions (CAAM-HP), cual ta un agencia di acreditacion cu lo acredita e universidadnan internacional di medicina cu ta estableci na Aruba. Haciendo esaki por garantisa e calidad y nivel di educacion.

CAAM-HP ta un organizacion internacional reconoci cu ta controla y acredita universidadnan di medicina, pa asina brinda e studiantenan cu finalisa nan estudio di MD e oportunidad pa continua nan estudio na Merca.



PROYECTONAN DI INFRASTRUCTURA DI SCOL:

A logra renoba Sint Aloysius School, cual a muda caba bek na nan scol den un edificio completamente renoba y e contratistanan ta trahando riba e tokenan final.

A renoba dak di Scol Preparatorio Nos Paraiso.

Colegio Laura Wernet a logra cambia tur bentana na un banda y a recap e speelplaats completo cu asfalt.

Minister President Evelyn Wever- Croes cu e Proyecto Futura a percura pa materialnan di digitalisacion, digiboard pa dicho scol.

A drecha 2 lokaal grandi di IPA cu tabata fuera di servicio, a cambia plafond y e luznan y a logra pone bek den servicio desde augustus 2023.

A drecha y modernisa ful e sistema di coriente y a aloca 38 airco nobo y awo Souer Julliete, (ex-Emma school) ta conta cu airco den tur lokaal.

A logra upgrade e sistema di coriente di Maria Goretti College pa asina por aloca airco den tur klas.

Science, Technology, Engineering and Mathematics (SISTEM), hunto cu mas colega minister y Universidad di Aruba como resultado di colaboracion y UNESCO y Union Europeo a inicia un proyecto di renobacion di Maria Convent. Un inversion na balor di 5.5 miyon us dollar.

A renoba e gymzaal di Scol Basico Washington.

A aproba den 2023 den Presupuesto Supletorio 6.7 miyon florin pa un scol nobo pa Juliana School Mavo den e bario di Paradera.

A aproba den 2023 un suma di 2.6 miyon florin pa e di dos fase di construccion di Mon Plaisir Havo.

A aproba den año 2023-2024 un suma di 6.4 miyon florin pa normbedrag.

Normbedrag: ta e compensacion cu schoolbestuur ta ricibi a traves di exploitatie subsidie, cual ta angra den ley pa cubri, entre otro, costo di mantencion, seguro di edificio, limpieza di e lokaalnan, inversion pa desaroya material, "hulpmiddel",

lesmateriaal, utilidad, esta awa y coriente. Normbedrag aki ta core mas di 10 año atrasa. A traha un rapport, cual a indica cu enseñansa mester ricibi 6.4 miyon florin structural pa haal in e retraso. A defende esaki den Consejo di Minister y a aumenta esaki 4 di september cu 3.2 miyon y awo cu a aproba Presupuesto 2024 a aloca e otro 50%.

Enseñansa a ricibi casi 16 miyon florin extra di inversion cu e ultimo 3 proyectonan menciona.

Tambe, a inverti mas cu 1 miyon florin den Biblioteca Nacional di Aruba. A cambia tur airco, kozijn y bentana, a drecha e dak cu tabata leak pa mas di 10 año.

A FIRMA MOU CU COLLEGE Y UNIVERSIDADNAN MERICANO Y CANADES

A firma diferente acuerdo beneficoso pa nos studiantenan di Aruba cu college y universidadnan di Merca y Canada, entre otro, Centennial College, Sheridan College, Ontario Tech University Merca, Valencia College, University of Central Florida (UCF), Florida Institute of Technology (FIT), South Carolina, Coastal Carolina.

E acuerdonan aki ta haci e aspecto financiero uno mas factibel y a crea espacio pa e studiantenan di Aruba haya un "in-state tuition", en bes di "tuition" internacional. Esaki ta nifica cu en bes di paga rond di 30 pa 40 mil dollar, e studiantenan di Aruba por paga awo solamente rond di 16 pa 18 mil dollar. Esaki ta un oportunidad grandi pa e studiantenan di Aruba cu ta desea di continua nan estudio na Merca of Canada.

Pa conclui, Minister Endy Croes ta gradici tur esnan den e veld di enseñansa cu a traha cu pasion y amor durante año 2023. Danki pa contribui den e desaroyo di enseñansa den su totalidad. Durante año 2024, lo sigui traha duro pa e bienestar di enseñansa di Pais Aruba.



Minister Ursell Arends:

CELEBRACION DI CAMBIO DI AÑA CU CASNAN DI CUIDO

Dia 2 di januari 2024 a celebra e cambio di aña na cuater cas di cuido. Minister Arends a comparti un dande cu nos adultonan mayor hunto cu e grupo Conhunto297.

E celebracion tradicional aki a sa di alegra nan dia como tambe e ekipo di minister cu e grupo musical. Durante e festividad, adultonan mayor por a baila y disfruta di e dandero den bon ambiente.

‘E ta importante pa nos corda ariba nos adultonan mayor, no solamente durante fechanan special, si no henter aña. Un poco di nos tempo por trece nan un felicidad grandi cu no ta

costa nos nada’ Minister Arends a remarca.

Ta gradici Amilia Care Services y e tres filial di SABA pa habri nan porta. Tambe un danki na Mario Croes, Ryan Maduro, Erik Ras, Rudy Ras, Jessica Ras, Marlon Jacobs y Daniel Werleman di Conhunto297 pa trece ambiente cu nan dushi dande.

Ministerio di Asuntonan di Adulto Mayor ta desea tur hende grandi y esnan cu ta traha den nan cuido un prospero aña 2024 yen di bendicion y salud.





Aña 2023 tawata un año di hopi cambio y sacrificio cu hunto, como un comunidad, nos a carga. Ta asina so nos por carga e peso di compromisonan financiero cu Aruba a keda cu ne despues di e pandemia, y e debenan di prome cu pandemia.

Nos a enfrenta obstaculonan cu a pone nos pasenshi y resistencia na prueba. Sinembargo, ta e momentonan aki ta demostra berdaderamente e spiritu di union y determinacion cu ta inculca fuertemente den cada Arubiano.

Aña 2024 ta bira e año di estabilidad di nos pais, cu e mesun union y determinacion pa Aruba por progresa, y pa asina e prosperidad y felicidad por yega den cada hogar na Aruba.

2024

AÑA DI STABILIDAD Y PROSPERIDAD